

補
侍
兒
小
名
錄

王
銓
著

中
華
書
局

補侍兒小名錄

此據稗海本排印
初編各叢書僅有
此本

補侍兒小名錄

宋 汝陰王 鉅

建康小史曹著見廬山夫人夫人命女婉出與著相見女欣然命婢瓊枝令取琴出婉撫琴而歌曰登廬

山兮鬱嵯峨睇陽風兮排紫霞欣良運兮暢雲柯矯雲龍兮樂太和琴歌既畢婉便回去祖台志按

袁真在豫州遣女妓紀陵送薛郭馬三妓與桓宣武馬遂生桓南郡續搜神記

齊惠公妾蕭同叔子生子棄之有狸乳而鵲覆之取而養之字曰無野是爲頃公代有齊國搜神記

宋何恢爲廣州刺史有妓曰張耀美而有寵將之任要權貴阮佃夫飲設樂佃夫見耀華悅之頻求於恢

曰恢可得此人不可得也佃夫怒拂衣出戶曰惜指失掌遂諷有司以公事彈恢坐免南史

霍去病父仲孺河東人以縣吏給事平陽侯家與侍女衛小兒私通生去病仲孺吏畢歸家娶婦生光因

絕不相聞久之去病爲驃騎大將軍擊匈奴道出河東河東太守郊迎至平陽邸舍遣吏迎仲孺趨入

拜謁將軍迎拜因跪曰去病不早知爲大人遺體也仲孺叩頭曰老臣得託命將軍此天力也去病爲

仲孺大買田宅奴婢而去臧

晉賈后召愍懷太子入朝置于別室遣婢陳舜賜太子酒三升太子辭而不能飲舜逼之曰不孝也天賜

汝酒而不飲中有惡物耶太子不得已強飲遂大醉又令小婢承福以紙筆授太子使書之曰陛下不

自了。吾當入了之。字半不成。后補成之。呈帝。廢太子。王隱書

孫綽韓非靈語責李中書曰。建元元年六月。余家婢辟邪夜眠。如夢嚶語半時。云忽有一老公。著黃練巾。身短衣長。甚自矜厲。瞑目切齒。云吾是刑名先生韓非弟子李充。日習吾業。綜習吾書。云云。孫綽集

晉泰始二年。使使持節兼五官中郎將宗正丞司馬恢。拜崇陽園姜李琰爲脩華。王宣爲脩容。徐琰爲脩儀。吳淑爲婕妤。趙珽爲充華。十年使太常洛陽令司馬啟。拜采女胡方爲貴嬪。又使御史中丞太子舍人司馬誕。拜采女劉瑗爲淑妃。臧曜爲淑媛。趙祭爲脩容。陳秀爲脩容。咸寧三年。拜美人左嬪爲修儀。邢蘭爲婕妤。朱姜爲容華。晉起居注

宋元凶劭姊東陽公主應閣婢王鸚鵡。南史

魏文帝宮中侍女所絕寵者。有莫瓊。樹薛夜來。陳尙衣。段巧笑四人。崔豹古今注

唐進士段何。太和八年。賃居臥病。有四人負金碧而從。二青衣。一雲鬟。一半髻。皆絕色。說論再三。何終不應。乃以紅牋題詩一篇。置何樓上而去。其詩云。樂廣清羸經幾年。姪娘相托不論錢。輕盈妙質歸何處。

惆悵碧樓紅玉鈿。書迹柔媚。亦無姓名。紙末惟書一我字。何自此疾日退。河東記

南陽張不疑。開成四年。應宏詞。寓京師。以錢六萬置青衣鴉鬟。垂耳曰春條。善書。音旨清婉。有所指使。無不愜適。又潛爲小詩曰。幽室鑲妖艷。無人蘭蕙芳。春風三十載。不盡羅衣香。不疑素禮。門徒尊師者。謂不疑曰。郎君有邪氣。不疑令作法。春條撲然作聲。視之一朽冥器耳。背上題曰春條。其衣服若蟬殼然。

博異志

武德中曹惠爲江州參軍。官舍佛堂中有二木偶人。長尺餘。工飾甚巧。因持歸。與稚兒戲。稚兒食木偶。引手請之。惠問曰。爾何時物。頗能作恠。曰。輕素與輕紅。是宣城謝太守家木偶。且曰。廬山神要索輕素等爲舞姬久矣。請命畫工。賜以粉黛。惠令工人爲飾之。輕素笑曰。此度非論舞妓。亦當爲彼夫人矣。幽怪錄崔紫雲。兵部李尙書樂妓。詞華清峭。眉目端麗。李公罷鎮北都。爲尹東洛。時方家妓盛列。諸府有宴。臺官不赴。杜紫微時爲分司御史。過公有宴。故留南行一位待之。爲訪諸妓。併歸北行三重而坐。宴將醉。杜公輕騎而來。連引三觥。顧北行回顧主人曰。嘗聞有能篇詠紫雲者。今日方知名不虛得。儻垂一惠。無以加焉。諸妓皆回頭掩笑。杜作詩曰。華堂今日綺筵開。誰召分司御史來。忽發狂言驚滿座。三重粉面一時回。詩罷。升車鞚轡而歸。李公尋以紫雲送贈之。紫雲臨行獻詩曰。從來學得斐然詞。不料霜臺御史知。愁見便教隨命去。戀恩腸斷出門時。

寶梁賓夷門人。詞筆容態皆可觀。進士盧東表念其才藻。緣而錄之。嘗爲嘉東表及第詩云。曉粧初罷眼初開。小玉驚人踏破裙。手把紅牋書一紙。上頭名字有郎君。又有雨中看牡丹詩。東風未放曉泥乾。紅藥花開不奈寒。待得天晴花已老。不如攜手雨中看。

程洛賓。長水人。爲京兆參軍。李華所錄。自安史亂常分飛南北。華後爲江州牧。登庾樓。見中流松棹有鼓胡琴者。李喪色而言曰。振絃者宛如故舊。令問之。乃岳陽郡民王氏之舟。詢其操絃者。是所錄侍人也。

王氏尋令抱四絃而至。李轉加凄楚。問其姓。對云是隴西李氏。父曾爲京掾。自祿山之亂。父倉皇劍外。母程氏乃流落襄陽。父母俱有才學。所著篇章。常記心口。因誦數篇。乃李公往年親制。泫然流涕。且問洛賓所在。投絃再拜。嗚咽而對曰。已爲他室矣。李嘆曰。是知父子之性。雖間而親骨肉之情。不期而會。便令歸宅。揖王君別。求淑姬。齎幣詣洛賓使回。洛賓寄詩曰。魚鴈回時寫報音。難憑冰蘖數年心。雖然情斷沙吒後。爭奈平生怨恨深。已上女舞圖

唐右司郎中馮翊喬知之。有美妾曰碧玉。知之爲之不昏。武承嗣借以教諸姬。遂留不還。知之作綠珠怨詩以寄之。碧玉赴井死。承嗣得詩於裙帶。大怒。諷酷吏羅告族誅之。寶治通鑑

貞元中進士賈全虛者。黜於春官。春深臨御溝而坐。忽見一花流至全虛之前。以手接之。香馥頗異。旁連數葉。上有詩一首。筆蹟纖麗。言詞幽怨。詩曰。一入深宮裏。無由得見春。題詩花葉上。寄與接流人。全虛得之。悲想其人。涕泗交墜。不能離溝上。街吏頗疑其事。白金吾奏其實。德宗亦爲感動。令中人細詢之。乃於翠筠宮奉恩院王才人養女鳳兒者。詰其由云。初從母學文。選初學記。及慕陳後主孔貴嬪爲詩。數日前臨水折花。偶爲宮思。今敗露。死無所逃。德宗爲之惻然。召全虛授金吾衛兵曹。以鳳兒賜之。車載其院資。皆賜全虛焉。

經行寺僧行蘊灑掃堂殿。見所畫女人。姿顏妖冶。戲曰。世間女人得如此者。我必作妻。其夕有歎扉者。蓮花娘子來。從一侍婢。妖姿麗質。妙絕人倫。蓮花顧侍婢曰。露仙可準備韓帳。

天水趙旭家于廣陵。夢一青衣挑笑窗牖間。及覺。忽有清香滿室。有一女子。年可十四五。容範曠代。笑曰。吾天上青童。久居清禁。時有世念。帝罰下人間。感配於君子。時叩柱清歌曰。白雲飄飄星漢斜。獨行竊窺浮雲車。通幽記

唐韋諷家于汝潁間。遣小童理草鋤地。忽見人髮。鋤漸深漸多而不亂。諷異之。卽掘深尺餘。乃一婦人。肌膚容色儼然如生。再拜言曰。某是郎君之祖女奴。名曰麗質。娘子嫉妬。生埋此園中。

開元中有士人從洛陽道見一女子。容服鮮麗。泣謂曰。已非人。昆明池神之女。嫁劍閣神之子。夫婦不和。無由得白父母。故欲送書一封耳。士人問其處。女曰。池西有斜柳樹。君可叩之。若呼阿青。當有人從水中出。士人入京。便送書池上。果有此樹。叩之。頻喚阿青。俄見幼婢從水中出。得書甚喜。曰。久不得小娘子消息。延士人入。謂曰。君後日可鑿至此。如期果有女子從水中出。手持真珠一箇。笑以授士人云。上巳會昌解頤集

趙王鎔命馬或使于燕。劉守光命韓定辭館之。時燕之酒妓轉轉者。一代名姝無比。韓之所眷也。每當酒席。馬頻目之。韓曰。昔文公分季隗於趙衰。伯符輟小喬於公瑾。蓋惟名色可奉名人。所慮倡婦不勝賢者。顧矚願垂一詠。故得奉之。或卽命筆授毫。文不停綴。作轉轉之賦。其首曰。玳筵旣啟。雅樂斯陳。霧卷羅幕。花攢錦茵。有西園之上客。命南國之佳人。貌逞嬋娟。縱玉韻而傾國。步移縹緲。蹴羅襪以生塵。或載以歸。劉崇遠耳目記

穆員稱其麗。善歌。聽之使人醉者醒。醒者醉。悲者樂。樂者悲。聲音能移人爲工。

穆員集

柳條女奴也。成都米市橋。僞蜀時有柳條家酒肆。蓋當時皆以當壚者爲名。柳條偶得患。沉綿經歲。俟死而已。有一道士常來貰酒。柳條每加勤奉。乃留丹數粒。柳條初服一粒。疾起能食。再服能行。終服充盛如初。

成都古記

元公鎮南海日。疽發於鬢。氣息惴然。忽有一少年道士直來床前。謂元曰。本師知公病。遣某將少膏藥來。可傳之。元公寵姬號靜君。收藥貼之。至暮而愈。失道士所在。

劉公嘉話

韋洵美先輩。開平歲及第。受鄴都從事辟焉。乃挈所寵素娥行。羅紹威聞其姝麗才達。臨河令女使齋二百疋及生餼而露意焉。洵美無所容足。遂令粧束更衣。修緘獻之。素娥姓崔氏。亦大梁良家子。善諧謔。筆札和淚作詩曰。妾閉閑房君路岐。妾心君恨兩依依。魂神儻遇巫娥伴。猶逐朝雲暮雨歸。洵美乃不受辟。夜度河宿一寺。長吁而寢曰。何處人能報不平。寺有行者排闥而揖曰。先輩蓄何不平事。洵美具語之。欻然出門而去。至三更忽擲一皮囊入門。乃貯素娥而至。侵曉問寺僧。言在寺打鐘勤苦三十餘年。已不知所之。洵美卽遁迹他所。

燈下閑笑

小東長沙之妓人。以能詩得幸於馬氏。後國入爲郡。窮於京師里。而人絕不知。余憫其老。詢長沙宮中事。則必南望泣涕而後言。因爲作小東詩焉。

薛九江南富家子。得侍宮中。善歌。嵇康。嵇康江南曲名也。學舞於鍾離氏。建業破。零落於江北。予遇於洛

陽福善坊趙春舍飲酣。於是歌嵇康其詞。卽後主所製焉。嘗感激坐人皆泣。春舉酒請舞。謝曰。老矣。腰腕衰硬。無復舊態。乃強起小舞。終曲而罷。座有王生者。請予爲嵇康小舞詞。曰。薛九三十侍中郎。蘭香花態生春堂。龍盤王氣變秋霧。淮聲哭月浮秋霜。宜城酒煙濕羈腹。與君強舞當時曲。玉樹遺辭莫重聽。黃塵染鬢無前緣。我聞襄陽白銅鞮。荒情古艷傳幽悲。淒涼不抵亡國恨。座中苦淚飛柔絲。洛陽公子擎銀觴。跪奴和曲生玄光。茂陵旅夢無春早。彤管含羞裁短章。已上錢易集

王霞卿者。藍田人才。華清瞻節行尤高。進士鄭殷。喪旅於會稽。寓唐安寺樓。見粉壁間有題云。瑯琊王氏霞卿。光啓三年陽春二月。登于是閣。臨軒軫恨。覩物增悲。雖觀煥爛之華。但比淒涼之色。時有輕綃捧硯小玉看題。其詩曰。春來引步強尋游。恨覩烟霄簇寺樓。舉目盡爲停待景。雙眉不覺自如鉤。鄭子依韻繼之曰。題詩仙子此曾遊。應是尋春別鳳樓。賴得從來未相識。免交錦帳對銀鈎。霞卿乃故邑宰韓嵩。自京師挈之任所。嵩緣遇暴冠而卒。鄭子怡然而往謁之。霞卿竟辭以疾不見。只令總角婢子輕綃持詩以贈之。詩曰。君是烟霄折桂身。聖朝方切詔良臣。正堪西上投知己。何必留程見婦人。鄭得詩抱慙而去。女仙圖

王琨父憚。不辨菽麥。時以爲殷道矜之。流人無肯與婚。家以獠婢恭心侍之。遂生琨。初名崑崙。憚後娶樂玄無子。故以琨爲名。立以爲嗣。南史

王藻尙宋文帝第六女臨川長公主諱英瑗。公主性妬。而藻別愛左右人吳崇祖。主讒之於廢帝。藻下獄。

侍兒小名錄 補

八

死主與王氏離婚。南史。

寵姐寧王愛姬王宴客妓妾皆在獨寵姐無得見者李太白恃酒強之迺設七寶簾使寵姐隔簾而歌。唐史。